

Edizioni

- letto 278 volte

Cots

I.

Aissi cum cel que baissa.l fuoill
e pren de las flors la genssor,
ai eu chausit en un aut bruoill
sobre totas la bellazor,
car eis Dieus, senes faillida,
la fetz de sa eissa beutat
e mandet c'ab humilitat
fos sa grans valors grazida.

II.

Ab doutz esgart siei cortes huoill
m'ant faich gai e fin amador,
et anc l'amors per q'ieu mi muoill
ab l'aiga del cor ma color
no fon per mi espandida;
mas era.m fai chantar de grat
de tal on an maint coindeiat,
c'us no la tenc desvestida.

III.

Non dic feinchas ni laus, cum suoill,
mas ver, don me son mil autor,
c'usqecs desira so q'ieu vuoill,
cal plus gai es lansa d'amor
qe.l fer al cor ses gandida
ab plazens plazers d'amistat;
mas ieu ai.l colp asaborat,
cum ieu plus dorm mi ressida.

IV

Chausimen fara si m'acuoill
a merce contra sa ricor,
q'ieu li mostre.l mal de qe.m duoill
en que m'aleuge ma dolor

c'a dinz mon cor espandida:
Amor e Cossirier m'a dat,
que del mieils m'a enamorat
q'es del Puoi tro en Lerida.

V

Sos rics pretz es en l'aut capduoill
de midonz c'om ten per gessor
q'el mon si vesta ni·s despuoill:
gent la saup Dieus far ad honor,
c'aissi es pe·ls pros chauzida,
lai on mostra sa gran beutat
e son fin pretz tant esmerat
c'a las pros n'esta garnida.

VI

Tant es genta e de bel escuoill
q'enveia·m tol d'autras s'amor,
c'ab enseignamen, ses janguoill,
l'es dada beutatz ab valor,
cortesia non obliida;
c'us de cortesa voluntat
la fai ses geing d'enemistat
gardar e d'autra esbruida.

- letto 262 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911
CF 80209930587 PI 02133771002

Source URL: <https://letteraturaeuropaea.let.uniroma1.it/?q=laboratorio/edizioni-876>